

摘藻堂四庫全書薈要

集部

欽定四庫全書薈要

集部

淦水集卷八

詳校官助教臣謝登雋



欽定四庫全書薈要卷一萬六千四十九

集部

滄水集卷七

金趙秉文撰

律詩

春山詩意圖



何年身入畫圖傳，似是三生孟浩然。
詩句工夫驢背上，醉鄉田地酒旗邊。
一川芳草綠堪染，夾路杏花紅欲然。
想見歸來泥樣醉，却如蘸水柳三眠。

春日即事

支頤偶到野人家總把深心付物華
鳥毳餘情閒日月花心深蠹半塵沙
遊絲逆上風中柳亂沫分屯水際楂
且共年光暫觀化直須美酒送生涯

酷暑二首

林鴉開味忘飛騰天地為爐萬物蒸
水井湯鑊幾千尺塔鈴風悶十三層
夢魂正繞雲帆客畫本閒臨雪麓僧
一枕雨牕惟靜勝不須赤脚踏層冰

又

石枕繩床夏簟藤慢膚終日厭歔蒸夢飛楚澤三千里
人在秦樓十二層松頂露涼時警鶴山房泉冷獨輸僧
人間膏火鑒城市世外清涼勝飲冰

棕扇

犀甲龍鱗倚半空抱歸掌握自清風山精附木鬚髯古
回祿扇炎尾鬣紅何處青蠅千里外向來白羽一揮中
水邊石上應須此乞與文園病肺翁

三臺懷古

人道奸雄看似鬼
奸雄我道鬼
輸君身猶北面魏
基建骨入西陵
漢鼎分貪與
卯金成舜禹
不知典午笑桓文
清漳不洗前朝惡
日繞三臺送夕曛

寄王處士

寄與雪溪王處士
年來多病復何如
浮雲世態紛紛變
秋草人情日日疎
李白一杯人月影
鄭虔三絕畫詩書
情知不得文章力
乞與黃華作隱居

登友雲亭

友雲飛觀鬱崔嵬落木蕭蕭聽者哀九日朱絃和鴈斷
開年黃菊費詩催淮天雨露檣千里梁地風煙酒一盃
此日此生人共醉明年重健與誰來

除夜二首

龍鍾三十九年春諱說新年似諱貧醉白名堂甘後進
小坡著號似前身自憐耐辱稱居士人笑無機似道人
斷送生涯一枝足不須長物擾天真

梅花無信報平安又聽譙門畫角殘荒郡人烟窮臘外

上方樓閣晚雲端
沈沈鳥沒天無盡
漠漠烟昏山更寒
日暮數峯猶帶雪
城頭霽色入闌干

娛暉軒

石晉地形今日眼
幾人亭榭幾人詩
數州山水有窮處
萬古風煙無盡時
天逐南帆秋鴈遠
風遮西望夕陽遲
客來欲問忘歸意
挂起僧軒君自知

馬頭山清居院

每逢佳處輒安跽
及到清居半日慳
曉壁撼鐘雲離石

夜泉洗鉢月搖山人生能作幾時客林下都無一箇閒
不信試看題壁字明朝多是馬頭還

松聲

飛廉作意怒髯龍萬壑千巖氣象雄獨鶴夢中搖夜月
七絃徽外寄秋風石壇醮罷支筇裏天竺齋餘隱几中
想見紛紛吹子落山堂一枕耳偏聰

默爾根酒

乍拆香泥甕釀成一鞭先到日邊城玻璃色映薔薇露

沆瀣光浮金菊英偶脫中州先酒譜賴傳後世以詩名
相如病渴焉能賦久矣吾衰畏後生

連雲島望海

壯觀天東第一遊曉披絕島寄冥搜煙中熊岳隨潮沒
天際遼江入海流地絕四維那辨樹風來萬里忽通舟
我從析木西南境回望中原四百州

庚申元日

一從禁苑別花甄四度山城自作年愁裏椒盤雙淚落

坐中歲酒幾人先此心不動吾何敢老去知非理固然
白髮無兒何足道且收見在鬪尊前

送張仲山

千山飛雪白皚皚袖裏吟鞭送客來鬚出冰霜年貌改
眼藏狐貉語音猜風吹陰磴魚鱗卷日曝陽坡龜兆開
北去人煙山店遠且煨新火煖離杯

和林卿錦波亭韻

使君興寄本翛然愛此澄波清且漣楊柳陰中黃鳥地

笑簾香底白鷗天涼通簾幌風生座露浥琴尊月滿船
相見仙裾乘一葉恍疑太乙下雲邊

伯奇雜興十首

黑山潢水解弓刀笏屋朝來聽伯勞萬里馬辭邊雪苦
一聲鴈拂朔雲高關山落日家何在詩酒春風氣尚豪
試上荒城望鄉國重來清鏡鑷霜毛

南園

塹水垣城斷往還青林路轉礙幽關百年樹腹通人過

四月花枝對酒閒逸馬風牛春雨草荒天老地夕陽山
金丸逐勝非吾事心在歸鴻滅沒間

翠微軒

千里風煙棟宇間地形西去接松關尊前奚霅來朝地
雲外幽燕不斷山故壘蕪城人物換斷霞落日古今閒
百年興廢人空老水自東西鳥自還

鎮國寺

靈鷲飛來處處尊綠雲細路絡城根百年樓殿倚天末

萬井風煙當寺門五月微涼清佛界六時豪吹動祇園
四山放入無多力乞與西南構一軒

七金山寺

剝簷篆額蠹蝸涎象教塵埃閱百年殿棟猶題遼日月
圖經不載禹山川荒碑盤屈蜿蜒古壞壁叅覃罔象拳
想見當時崇奉日無邊花雨散諸天

野香寺

半空欄檻倚雲根暇日登臨付一尊山上青蓮惟見塔

水邊綠樹定知邨花枝低拂尋春騎杜宇頻傷久客魂
過盡芳時游客少一軒風雨送黃昏

靈感寺

徒河岸北白蓮東法鼓驚飛碣石鴻塔上風煙高鳥路
山頭雲雨化人宮松林碍日蜂房冷石砌頽沙蟻穴空
欲盡休公揮麈樂髮絲羞對落花風

蘭若院

傳經蘭若歲時同繡轂珠簾處處逢花院鳥歸深殿磬

雨樓人散隔城鐘
長空淡淡吞平楚
落日微微見遠峰
年去年來人自老
空餘壞衲挂長松

金河寺

何處人間六月秋
金河寺外水西頭
坐分游客青天幕
醉倒詩仙白玉舟
萬里南風雙老鬢
百年心事一沙鷗
王侯蟻虻俱塵土
一笑從來萬事休

趙園

佳木千章曲岸臨
此園閱世似飛禽
地幽花晚春兼夏

山近嵐昏晴似陰
溪雨斷橋愁渡水
樵風吹帽怯穿林
馬頭納納沙邊路
霜葉濃時憶重尋

扈蹕萬寧宮

一聲清蹕九天開
白日雷霆引仗來
花萼夾城通禁籞
曲江兩岸盡樓臺
柳陰罅日迎雕輦
荷氣分香入壽杯
遙想薰風臨水殿
五絃聲裏阜民財

琵琶嶺

曉拂朱闌滿袖風
支頤吟望翠微中
薄雲漏日巖開碧

淺露離花澗滴紅馬散平坡臨水聚人來盤路到山窮
子雲老大無才思懶賦長楊五柞宮

拂雲坪

萬疊雲山最上頭千官影裏侍宸游翠巖秀色來天地
黃嶺嵐光上冕旒帳殿影臨眠鹿地簫韶韻入射熊秋
翠華指日東巡狩回望中原第一州

金蓮

一望金蓮五色中離宮風月滿雲龍向來萼萼香銷盡

何許薔薇露染濃秋水明邊羅襪步夕陽低處紫金容
長楊獵罷回天仗萬燭煌煌下翠峰

五月牡丹

好事天公養露芽陽和趁及六龍車天香護日迎朱輦
國色留春待翠華穀雨曾霑青帝澤薰風又卷赤城霞
金盤獻瑞休嗟晚猶是人間第一花

和王正之寄遠二首

人生會合少知音一榻高懸肯重尋後日相逢應老大

何時一笑共登臨
三年京國塵埃夢
千里故人離別心
想見詩來愁擘紙
倚闌清快北風襟

又

鍾鼎功名自有時
如公才力不嫌遲
且尋彭澤籬邊菊
莫賦玄都觀裏詩
晝寢執經童子問
春游齋印吏人隨
懸知山縣無公事
好續琴高第二碑

甲子元日大安早朝

闕角蒼龍建斗杓
衣冠萬國大安朝
使臣未入分班立

殿陛將升按笏招彩殿中間瞻北極丹墀側畔聽簫韶
太初甲子天元朔萬歲常瞻玉燭調

紅梨花應制

染根日日費天工眼底梅花夢不同春色似憐啼夜雨
天恩特許醉春風袖障翡翠餘輕碧雪點胭脂暈小紅
漢主藥宮三十六溶溶和氣月明中

轅門不寐

蕭蕭傳柝月三更歌枕轅門聽鼓聲戰馬不肥淮甸草

征人愁望歷陽城
兵戈往苒音書絕
行李蕭條蟣虱生
早晚樓船下揚子
滿天風雨洗蠻荆

寄懷

不問山林與市朝
大都鵬鷃各逍遙
歸心老去投林鳥
壯志春來挂壁貂
聖處工夫惟易可
閒中日月以琴消
十年鏡裏功名事
白髮年來漸不饒

賦雪和張子野巡字韻

翰林風骨玉為神
天遣簷花送酒巡
侍從驂騑應白鳳

神仙官府不紅塵
懸知潁尾風流舊
不及鼇頭句法新
天上玉堂誰得見
風光袞袞筆頭春

楊秘監畫高士過關圖

三生自是竹林遊
寫出荒寒意外愁
世事盡如翻著襪
人生剛笑倒騎牛
關山風月詩千首
富貴豪華土一丘
獨有文章磨不得
至今圖畫想風流

重陽後雪寄馬柔克

朝來飛雪白糝糊
城郭山川入畫圖
一色乾坤還太素

萬家樓閣化清都
狐裘貂帽將軍騎
金帳羊羔太尉姝
何似吾家正清絕
曉牕吟撚凍髭鬚

過代

金波曾醉雁門州
端有人間六月秋
千古河山雄朔部
四時風月入南樓
漢家戰伐雲千里
唐季英雄土一丘
繫馬曲闌搔首望
晚來閒殺釣魚舟

靜陽道中

路轉山腰步步迷
高林淺水下回溪
蕎花釀蜜蜂貪腹

栢葉儲香麝養臍不覺困來尋短夢偶逢佳處入新題
何時更到園林寺看遍峰巒處處低

題郝運使榮歸堂

翰墨聲名四十年歸來還作地行仙柴桑問路陶元亮
洛社休官白樂天拄杖扶兒還客拜畫圖繪老聽人傳
窮秋雨慘陂田出想見騎驢興眇然

遊郝家樂二首

山崦人家半夕陽倚牆爭看騎紅妝野泉自入他州界

古碣猶存舊姓鄉蛇出廟壩神古柳牛尋沙樂憩柔桑
蟬聲抵死催歸騎辜負亭陰一枕涼

水際林間杖屨香綸巾野服道家妝婦姑緝績欣同社
翁仲扶筇不出鄉拜跪使君嗟老大逢迎地主問耕桑
今秋一飽天難必且快新苗雨後涼

題近侍局使聚扇

早朝攜入紫薇宮日用都歸掌握中運動樞機真有道
卷藏懷袖不言功宸庭永日更番暇水殿微涼侍宴終

願以微軀奉清燕仁聲宣播舜絃風

張清獻公慶八十壽

富貴康寧壽八旬明時乞得自由身宦途班列聯三事
家法中朝第一人疏傳未歸東海郡白公獨享洛城春
贏金換得傳經業留與玄成贄化鈞

上方

山近西臺易夕煙東臺占得夕陽偏貪看歸鳥過林隙
不覺奇峯墮眼前土竈夜燒松葉火石盆曉漱菊花泉

金剛經
卷七
丹梯橫絕青山路勸子先參鳥道禪

題右丞畫荷篠圖

杏花菖葉雨聲春甘作明時荷篠身只道烏鴉猶父子
豈知螻蟻亦君臣杖頭明月挑周器松下衣冠自舜民
好在丹青王右轄解迴枯槁入陶鈞

遊上清宮二首

霜葉蕭蕭覆井闌朝元閣上玉簫寒千年遼鶴歸華表
萬里宮車泣露盤日上霧塵迷碧瓦夜深月露洗荒壇

斷碑膾炙人何在吏部而今不姓韓

暇日登臨近吹臺夷門城下訪寒梅黿頭他日幾人在
尊酒而今一笑開秋潦滲餘村逕出夕春鳴處夜禽來
醉歸扶路人爭看知是詩仙閬苑回

送月上人赴少林

隻臂伽黎不作難將心到處遣人安瓶離汴水秋風冷
錫入嵩峯夜月寒篋裏贈詩更雨曬囊中施鉢對風餐
心知擬就東林宿已向林梢薦剎竿

登定安閣

翬飛高閣迴凌虛中有盤盤一塔孤
千里河山隨指顧諸天日月遶彌
盧神超罔象遺身世眼盡蒼茫一
有無便欲乘風游汗漫幡然回首
念南都

許州襄城縣進嘉禾合穎應制

襄城城下壤歌傳驛奏嘉禾到日
邊穎合周王新雨露畝分黃帝舊
山川太平氣象連珠琲明德馨香
列豆籩萬國和同歸帝治古書願
獻補遺編

陳州進黃鸝應制

隴鳥明時亦效祥
天教合侍赭袍黃
九重城裏駢鶯舌
百子池邊借鵲裳
夜臂翠簾條脫市
春籠珠殿荔枝香
紫宸朝退鳴笳遠
偷學山稱萬歲觴

寄陳正叔

渺渺西風去翼輕
霜林楓葉動秋聲
嵩邛競秀容多可
河洛爭流忌獨清
廣武山川留故壘
成皋草木閔空城
憑高一掬英雄淚
付與窮途阮步兵

贈磨鏡李先生

自笑年來白髮公，丹砂不肯借顏紅。
分無海上三山藥，來訪人間百歲翁。
黃瀆何曾浣明月，青天元不碍冥鴻。
何時相約丹元子，便欲因之乘曉風。

記夢

六年京國鬢塵黃，一望家山一斷腸。
病後始知謀退晚，夢中猶記和詩忙。
風來竹裏娟娟好，水過花間冉冉香。
學道無成還自笑，人生習氣果難忘。

登天壽閣

人間赤日無處避
天上雲居即寶坊
鳥飛無碍長空濶
人意自生高閣涼
風來為作不請友
午夢徑到無何鄉
黃昏索馬出門去
猶望東華塵土黃

和劉雲卿

屏山沒後使人悲
此外交親我與雷
千里老懷何日寫
一生笑口幾回開
心知契濶留陳土
時復登臨上吹臺
目極天低雁回處
西風忽送好詩來

和種竹

君家種竹五七个我亦近栽三數竿
兩地平分風月破
大家留待雪霜看
土膏生意葉猶卷
客枕夢回聲已寒
見此又思君子面
何時相對倚闌干

寄元裕之

久雨新晴散痺頑
一軒涼思坐中間
樹頭風寫無窮水
天末雲移不動山
宦味漸思生處樂
人生難得老來閒
紫芝眉宇何時見
誰與嵩山共往還

送宋飛卿二首

雄豪而妙秀而文不獨吾云人亦云賀監早知仙李白
薛宣那得吏朱雲秋風汴水傷今別明月邠郊與子分
瘦李髯雷隔存沒只愁詩壘不能軍

李之純
雷希顏

未能免俗聊從宦遙望孤雲憶舊廬不樂徑歸真吏隱
得閒隨分寄僧居關山牢落三年夢行李蕭條一束書
想見蓮花峰下過路人遙指倒騎驢

至日次劉雲卿韻

此生天地一陳人百歲三分過二分老去光陰空惜日
愁來世事獨看雲靜中剝復觀消長身外榮枯聽糾紛
猶有憂時心未已卧聽兒誦戰場文

百五日獨游西園

西園啓鑰起芳塵滿眼風光不屬春樓閣人非空似舊
溪山歲久却成真斷橋沒板橫斜艇古木欹垣碍去輪
老去搜詩厭雕斲晚風吹水白鱗鱗

題王摩詰畫明皇劍閣圖

劍閣森危隔錦官雲間棧路細盤盤天迴日馭長安遠
雨滴鈴聲蜀道難當日六軍同駐馬他時萬里獨回鑾
傷心凝碧池頭句有底工夫作畫看

和欽止河中即事

鸛鵲樓前一望時長河寂寞送斜暉人歌人笑幾興廢
年去年來今是非寒雨渭流人渡斷秋風汾水雁來稀
千村萬落生煙靄更許砧聲暮擣衣

弔袁用之

小築中條四十秋安排佳處近休休
隱居境為王官勝仙伯名因少室留
架上殘書灰燼冷囊中妙藥鬼神偷
傷心天柱峯頭月曾照先生杖屨遊

古瓶臘梅

石冷銅腥苦未清瓦壺溫水照輕明
土花碧暈龍紋澁燭淚痕疎鴈字橫
未許功名歸鼎鼎且容風月入瓶罌
嬌黃喚起昭陽夢漢苑淒涼草棘生

雪意

門巷蕭條日易曛
豆稽灰欲落江雲
眼花淡淡初疑見
耳重蕭蕭竟不聞
便可一盃平體粟
不須六出點衣紋
殷勤急遣蓬萊使
探到梅花破幾分

栗

漁陽上谷晚風寒
秋入霜林栗玉乾
未拆稜櫚封萬殼
乍分混沌出雙丸
賓朋宴罷煨秋熟
兒女燈前爆夜闌
千樹侯封等塵土
且隨園芋勸加餐

憶橙

悵望天涯驛騎塵政須玉甲破芳新可憐虛度梅梢月
無計相陪竹葉春三日手香頻入夢一年秋好不關身
快須準備新詩句倘有金苞贈故人

射虎

眼光百步透林寒抵死嗔人守九關只道草中藏白額
豈知世上有黃間才聞父老愁三害倏見熊羆寢一斑
寄謝咸陽歎黃犬何如霧豹隱南山

冬至

天時人事不難量，消盡羣陰又一陽。
千里家山憑夢到，數莖白髮為愁長。
老來度日惟經卷，病後關心祇藥方。
六十之年今過五，不須苦死問行藏。

菊二首

水冷雲疎木葉黃，遶籬目送雁南翔。
酒傾桑落林廬靜，秋入騷人齒頰香。
人惜後期霜雨露，天教晚節傲風霜。
憑誰寄語陶元亮，不為南山興自長。

西風吹葉靜千林，獨有幽香伴苦吟。
細葉宮槐舒碧皺，

小花佛頂暈黃深誰憐細雨情何限可忍清霜瘦不禁
寄語兒曹莫輕折重陽留待付孤斟

九月十一日夜對月

無花無酒過重陽轉覺閒居興味長明月豈隨人薄厚
黃花不逐世炎涼閨年節晚初過鴈老境衾寒知有霜
清境喚回蝴蝶夢起尋竹影據胡牀

答趙慶之節使

故人別後定何如春雁來時忽寄書壯歲從軍幾人在

老來分守五年餘挂冠無計追弘景襍被何時作魏舒
遙想西川賢父老瓜疇閒伴故侯鉏

題劉萊州像

當年二老趙張儔

王儔然知府
焦明鏡運使

獨許先生第一流異政

曾聞山鬼伏直聲須向古人求從來走卒知司馬到處
兒童說細侯惆悵當年舊遊處羊曇不肯過西州

九日會極目亭

孤亭高壓冷雲堆九日登臨貫酒盃魏國河山殘照在

梁王臺殿野花開
鷗從白水明邊沒
雁向青天盡處回
未必龍山如此會
座中三館盡英才

再和

秋興高于灝瀕堆
秋光并入阮公盃
霜凋蒲劍三稜折
雨裂荷衣十字開
北雁遠浮梁水動
南雲低抱楚天回
前年此日登高會
點檢唯無短李才

謂屏山
死矣

過楊太尉墳

道傍古塚入荒榛
下馬摩挲漢八分
誰謂皇天無老眼

却令大鳥泣孤墳獨攜一盞霜風酒一酹三峰日暮雲
李杜就誅鉤黨起可能天下獨傷君

過邠州二首

地靈物秀古稱雄前有汾陽後范公千古山川形勝地
兩朝人物畫圖中一家忠厚餘風化七月蠶桑詠女工
誰識聖賢遺意在黍離篇末繼邠風

遙看涇水遶城流下盡陂陀始見州歲暮簡書催出塞
天寒風雪送行舟坡田井井龜圖畫山路盤盤篆印繆

更欲殷勤訪陳迹夜深燈火伴牢愁

過慶陽

地形占得古金湯感歎當時幾戰場父子一家三范帥
功名異代兩汾陽四山帶郭環天險二水分流會女牆
想見公堂無一事臨川閣上日飛觴

暮春得寒字

九日聊偷一日閒三分春色二分闌鄉關夢裏人空老
風雨夜來花更殘乍坼甕泥糕酒熟未開火禁粥飭寒

何時投劾歸田去楊柳陰中把釣竿

秋雨

十月秋霖不出門門前流水似江村
牆頭新竹大于母砌下老桐今有孫
澤雁背飛驚吹急濠魚逆上避河渾
秋風未得乘槎便擬控扶搖北海鷗

白塔

松林橫截東南野蘭若斜連子午庄
平楚風煙開鄠杜斷碑歲月自隋唐
樓頭山入詩人座砌下泉分衲子房

更欲秦川窮勝槩却從高塔望雲陽

過石氏園

樂天
故居

石氏園亭竹一圍眼前勝事只心知
幽禽有語能留客流水無情自入池
客裏歲華將盡日梅邊春信獨來時
醉吟吟後無吟者又得閒閒一首詩

上巳遊西園分韻得蘭字與楊禮部攜同院諸
公賦二首

相逢草草即盃盤誰識吾曹箇裏歡
燕蹴簷花墮茵席

魚搖波日動闌干無窮照影溪溪柳不住吹香畹畹蘭
已屬清明連上巳更容飛蓋接鴛鸞

跨鳳騎麟玉筍班蹇驢不作杜陵酸已煩蠟紙書陳迹
更許仙舟汎碧瀾酒令致師嚴細柳詩朋鏖戰劇皋蘭
遨頭却返瀛洲去夢覺揚州鶴背寬

挽劉雲卿

人物于今歎渺然如君才德幾人全忠言唐介初還闕
道學東萊不假年黃壤苦埋經世志青氈未了讀書緣

西園酬唱空陳迹淚灑南風擘素箋

楊尚書宮直雪作擬應制作詩某時在假聞而

和之二首

霰雪霏霏點玉英玉堂鈴索悄寒生也應天上多珂葉
無賴人間有化城兔苑因之賢者樂羊羔加以聖之清
吾曹安預籌邊事且及新年賀太平

黃昏陡覺悄寒生漏澁銅壺第幾更未放六花齊苑樹
先留半月抹宮城一陶風俗還純素盡領乾坤入太清

應似上方觀下界放教雙眼一時明

二月見梅花

不應開處避嚴冬無賴春寒雪尚封縱使風霜欺爾瘦
可能桃李為君容麗眉都尉嗟何晚飛騎將軍歎不逢
畢竟榮枯無定在此花勸汝倒金鍾

春寒花較遲

吟懷常恨負芳時及至春來雪尚滋榆莢半含椒粒色
柳條未變麴塵絲墻陰更覺花開晚水冷應知鴈到遲

慚愧蓬萊老仙伯已回和氣入新詩

殘梅

寒梅不作白頭新相對依依似故人
要伴賓鴻并社燕未隨流水與紅塵
空枝擬折猶堪嗅殘蕊重看不厭頻
自是東皇催鼎食無情風雨不關春

杏花

香傳微雨隔簾櫳十載舣船不負公
愁見餘春紛雪白且看初日眩霞紅
兩枝副使鶯吟裏一色新郎馬足中

投老安能知許事一鞭農事趁春風

此近體字樣詩
非詩也悚愧

慶學士叔獻七秩壽二首

乞得閒身七十餘知幾初不為鱸魚胸中幸有平邊策
林下聊觀養性書收拾雲山歸蠟屐卷藏事業入籃輿
君臣拊髀思頗牧未許先生作隱居

小築龍潭德不孤盧鴻新有草堂圖四朝人物今誰在
二老風流與我俱把酒笑談猶解醉上山筋力不須扶
文章不逐年齡改能為開興作頌無

訪天寧周老

敝策羸童負束書清晨渺渺獨騎驢
乍辭天上尚書履來訪雲間大士居
覽鏡年年非復我照溪處處得逢渠
從今莫訝經過數乞得閒身頗自如

滢水集卷七

欽定四庫全書薈要卷一萬六千五十

集部

湓水集卷八

金趙秉文撰

絕句

春遊四首

草荒一徑抱村斜
日暮初歸拜掃車
猶有飢鴉來攫肉
覘人飛下杜梨花

其二

無數飛花送小舟
蜻蜓疑立釣絲頭
一溪春水無情甚

皺作風前萬疊愁

其三

樹藏脩竹竹藏門
門外清流幾股分
行過小橋人不見
背陰花氣隔牆聞

其四

煙外絲絲風柳斜
春光也自到天涯
太平有象村村酒
寒食無家處處花

題扇頭

文書勾引黑甜鄉倦枕拋書午夢長夢裏棋聲驚雨電
覺來牕隙有斜陽

平湖戲鴨圖

平湖飛下感雙紋翻動江南水底雲盡日自來還自去
塵埃滿眼不如君

暮歸

貪看孤鳥入重雲不覺青林雨氣昏行過斷橋沙路黑
忽從電影得前村

正覺院

齋時一鉢僧上堂履聲如水度秋牕秋陽滿地槐陰薄
幽鳥飛來施食幢

登嵩頂

危躡嵩山頂上來五髯龍對八仙臺不知眼界濶多少
直盡黃河一曲迴

少林

只麼西來坐面牆更無一法付神光少林自有吹毛物

三十六峰如劍鋞

石樓

月約風期屢往還
水聲山色石樓間
大家也入香山去
那箇心如白傅閒

香巖寺壁

一夕秋風變素商
蕭蕭雲物換清涼
片雲不作前溪雨
飛過高城有底忙

嵩山道中二首

為愛青山懶著鞭
吟詩時作鶴頭偏
驀然得句驚飛鳥
撲簌巖花墮馬前

又

屋頭山色靜無埃
竹裏柴門水際開
驚怪籬中犬迎吠
有人知自碧嵩來

題南城樓

樓上遙看郊外村
不須騎馬坐平分
人家應在青山外
時有歸牛下白雲

題扇頭

魏三句裏數聲櫓
秦七詞中萬點鴉
好在團團明月底
一灣流水幾人家

三學院對月

何年覲佛闕天子各以寶花樓閣俱為問
上方銀世界不知有此夜寒無

清居寺五杉亭觀子野留題

五杉亭下祇三株
曾是詩人歎息餘
君去我來杉尚在

斷腸君沒見君詩

回春谷

冰崖雪柱道人家
谷榜回春事已夸
却恐陽和在泉底
未春先發忍冬花

祕魔巖

鐵鑊關藏五百龍
文殊遊戲作神通
山僧要辨金剛眼
莫謂魚蝦在此中

登萬聖閣

中州之山臺山高遍尋五頂無乃勞老去看山無脚力
直憑一閣了秋毫

馬頭

天外亂山圍曠野水邊孤塔背層城馬頭才指桑乾路
愁見行人問去程

趙橋

天垂曠野初疑合地轉深巖忽似窮偶向高崖聞笑語
寒春一帶夕陽中

鷄鳴山

煙蒸山腹晴猶濕
河帶冰漸暖漸流
獨上鷄鳴看出日
五雲多處是皇州

盧溝

河分橋柱如孤蔓
路入都門似犬牙
落日盧溝溝上柳
送人幾度出京華

漁陽道中

盤山曾借上方眠
落月蒼蒼響石泉
夜半峰頭聽鳴鹿

半崖松子落堦前

達北京

小車日日碾征塵
卧即看書坐欠伸
露宿風餐二千里
青山無處不隨人

龍山怪松

自笑書生骨相窮
倒騎驢看兩三峰
天東稍喜無碑讀
踏雪還來看怪松

東京見梅

二月天東凍未蘇
梅花市骨也清癯
一枝萼綠來千里
為問東君管得無

遼東

幾家籬落枕江邊
樹外秋明水底天
日暮沙禽忽驚起
一痕衝破浪花圓

北都雪望

千山雪盡出樵車
一徑雲移去似蛇
小屋平頭墟落裏
炊煙起處是人家

北都小雪

邊城小雪試年華
煙冷貔貅十萬家
探使不來人半醉
將軍氊帳卓平沙

襲香亭二首

小橋虹影截波光
面面荷花鏡裏妝
風月要知無盡藏
一亭分作兩亭香

又

黃堂公退吏人稀
露下西溪鶴未知
一榻清香無著處

曉風殘月獨來時

錦波亭

柳影移堤步晚涼
清溪放閘水泱泱
胸中經緯天機錦
閒却小亭風露香

雨晴二首

東風時送瓦溝聲
欹枕幽牕夢自驚
睡起不知雲已散
夕陽偏向柳梢明

又

一抹平林媚夕暉
山煙漠漠燕飛飛
倚闌遙認天邊電
何處行人帶雨歸

靈感寺二首

斜廊深院斷人行
雪聚松中立鳥清
僧臘數殘門乍啟
驚飛碎語獨含情

又

青青隱隱入煙微
一日看山坐水涯
何事晚來風截斷
偶看白鳥過林時

鷄鳴山下橋

兩山相對翠屏開
一水中流礙石迴
橋北橋南路分處
紅塵一騎日邊來

和舜元雜詩二首

瘦馬龍鍾雨鬢華
敲門避雨野人家
門前籬落猶懸露
十里晚風吹斷霞

又

三五殘星闕角東
淡黃楊柳月明中
貪看稚子收殘葉

駐馬天街滿袖風

聖安小集

松軒却扇風仍好
苔徑無花雨亦香
門外市聲塵午枕
老僧元不下禪床

和子約立春

唐虞禮樂歲元新
齊魯中書有大臣
泰定三年調玉燭
衣冠萬國拜王春

二青圖

金史四庫全書 卷八
大青天驥之雲仍小青八尺猶龍騰三十年來無汗馬
不將遺像鑄興陵

古北口

幾家墟落兵戈外數畝荒田澗谷中日暮圍場來野鹿
令人長憶筆頭公

撫州二首

蕭寺金風動剎竿西城北斗挂闌干一蟲不響夜更靜
片月未高山已寒

又

燕賜城邊春草生
野狐嶺外斷人行
沙平草遠望不盡
日暮惟有牛羊聲

北苑寓直

柳外宮牆粉一圍
飛塵障面捲斜暉
瀟瀟幾點蓮塘雨
曾上詩人下直衣

寓望

蒲根閣閣亂蛙鳴
點水楊花半白青
隔岸風來聞鼓笛

柳陰深處有園亭

戴花

病來酒盞懶重持
強為殘花折一枝
人老易悲花易落
東風莫近鬢邊吹

玉堂二首

玉堂看到午陰移
日薄春閒下直遲
悞喜交番旗脚轉
隔牆送過小桃枝

又

玉堂陰合冷牕紗雨過銀泥引篆蝸萱草戎葵俱不見
蜂聲滿院採槐花

西溪

山垠西北塵沙少水際東南風月寬盡日朱門人不到
鳬鷺引子傍闌干

夏直

玉堂睡起苦思茶別際銅輪碾露芽紅日轉堦簾影薄
一雙蝴蝶上葵花

過邯鄲

十五年來黍一炊
繁臺重覓舊題詩
而今馬上行人老
不似當初過趙時

臨洛

聰山洛水送還迎
世事浮雲幾變更
白髮重來相識盡
逢人欲問小時名

真際柏

趙州東院庭前柏
二百年來屈鐵柯
莫怪兩株纏欲死

後來禪客葛藤多

潯沱

潯沱一箭截天來六月砮雷打土崖一夜北風吹岸柳
直從中渡撐船迴

題閣立本職貢圖臨本二首

周王職貢朝萬邦右相丹青古無雙好本不應天下獨
解如明月印千江

又

金犀髻面覩天庭王會圖中見典刑已了宣威沙漠事
更煩右相寫丹青

墨梅

畫師不作脂粉面却恐傍人嫌我真相逢莫道不相識
夏馥從來逐玉人

香山

山秀薰人欲破齋臨行別語更徘徊筆頭滴下烟嵐句
知是香山境裏來

夏日

樹木交陰鳥自呼
遽遽殘夢破華胥
虛簷一道風如水
展盡牀頭幾葉書

太寧吟詩臺

雨中

易州山水甲天下一日太寧如死灰
山意似羞人識面
雨昏丞相賦詩臺

涑陽道中

石頭聲確水縱橫
人在青山影裏行
忽悟過溪驚笑語

斷崖郊屋暮春聲

昌平狄梁公廟

力扶滄海將頽日
目送西山不盡雲
一邑豈能沾惠愛
至今天下不名君

靈峰院

天門劃斷兩崖青
拄杖靈峯頂上行
一片白雲巖下起
不教眼力盡東溟

燕

宦游憐我食官倉贏得青青兩鬢蒼
不會無情雙燕子
南來北去為誰忙

湧雲樓雨二首

片雲頭上一聲雷欲到冠山風引回
牕外忽傳林葉響
坐看飛雨入樓來

又

簾雨風斜不上勾闌干吹濕怕人愁
雷聲驅雨東山去
指下斜陽恰半樓

樓上二首

樓頭四面好風生
下與遙山一樣平
睡起沙厨欹枕處
恰如水底看雲行

又

山城雨過怯衣單
清曉樓頭六月寒
却喚奚奴添半臂
要乘涼氣倚闌干

登晉陽閣

坡陀勢盡晉川開
一線汾河掌上來
斜日西風倚高閣

白鳥飛過天門回

中山會故人

三十三年役夢魂故人老盡一身存
燈前細雨當時話別後相思誰與論

下直

綠槐影裏鳥呼風退食涼生襟袖中
滿地綠苔承步障楸花無蒂落深宮

潭上二首

倒影花枝照水明
三三五五岸邊行
今年潭上遊人少
不是東風也世情

日斜飛盡往來塵
為怕春愁戀酒尊
醉裏不知歸去晚
先聲還著顯華門

宿王佐宅

鞍山柘水事茫茫
猶記同遊宿上方
老大重尋牕下宿
殘經堆壁故人亡

燕子圖三首

一別天涯十見春
重來白髮一番新
心知話盡春愁處
相對依依如故人

又

祝爾區區萬里身
錦書回寄莫辭頻
而今塞北看雙翼
多少中原失意人

又

交親消息兩何如
滿眼兵戈不得書
為問南來新燕子
銜泥曾復到吾廬

送人之河中

功名蟻穴夢南柯投老空門不較多
試看鐵牛無用處橫身終古負黃河

題李平夫畫黃山蹇驢詩圖二首

浮光林杪水參差意想先生得句時
千古黃山山下路蹇驢不是少人騎

又

三十年前濟水東詩中曾識蹇驢翁
如今畫出推敲勢

却恐相逢是夢中

中秋日郊外遇雨

斜風吹雨水生寒
荷蓋傾珠下
芡盤驚得鷺
鷺眠不得
衝煙飛過蓼花灘

登安定閣

春風吹袖著闌干
薄霧初收雪未殘
擬折梅花遮遠日
愁看直北是長安

滎陽古槐

滎陽縣東千古槐人言曾見漢朝來不知幾覺南柯夢
直至如今喚不回

虎牢


兩山峽束枕洪濤自古英雄爭虎牢蒼天胡為設此險
長使戰骨如山高

新安道中

草根啾唧候蟲鳴月黑山腰信馬行夾路水聲長在耳
六根先得一根清

滄水集卷八

謹案卷七第四頁前七行默爾根舊作抹里堪今
改 五頁後三行伯奇舊作白霄今改 六頁
前四行奚霄應改錫錫因收入詩內未便改譯
謹仍其舊



總校官庶吉士臣張能照

校對官庶吉士臣陳文樞

謄錄舉人臣呂燕昭

欽定四庫全書薈要

集部

淦水集卷九

十

詳校官助教臣謝登雋



欽定四庫全書薈要卷一萬六千五十一

集部

淦水集卷九

金趙秉文撰

律詩

遊華山四首

石頭硤
硤水縱橫過雨山間草屨輕未到上方先滿意
倚天青壁看雲生

其二

我與青山有舊盟淡雲微雨忽淪平朝來自獻三峰秀

真箇神仙不世情

其三

仙人仙去有仙掌袖中擲下青芙蓉遺與楊羲書一紙
暫留笙鶴駐中峰

其四

玉龜山下古仙真許我天台一化身擬把嶽蓮騎白鶴
下看浮世幾揚塵

河上公廟

河上丈人忘姓名一編道德了一生時來河上觀物化
投膠欲變黃河清

稠桑谷遇雨

窮秋兩渡稠桑谷馬滑還經險路過騎上小山三十里
天教衝雨看黃河

濟源四絕

歌管年年樂太平而今鉦鼓替歡聲裴公祠下無窮水
好乞餘波為洗兵

其二

祠前繚繞無窮水樹杪參差不盡山極目水窮山盡處
天壇猶在白雲間

其三

樹映樓臺水映空溪容林意兩溶溶夏山如醉無人畫
遠處微茫近處濃

其四

氍毹雲木曉相叅寺枕龍蟠十頃潭一逕通幽竹深處

居人指似侍中菴

山行四絕

終日看雲不忍還馬蹄
聲確兩山間雨聲欲到詩人耳
雲氣先濛一半山

其二

漠漠青田鷺啄苔
背人飛去又飛回
青山影裏銜青稻
知自濟源枋口來

其三

樹根繫棧水淪漪雨裏看山大奇不見文公陳迹在
摩娑苔壁認題詩

其四

玉柱峰前紫翠堆道人架竹引泉來穿雲絡石無人見
下赴龍門作怒雷

雨晴

一春無雨作泥香碧瓦朝來泛霽光留得紫薇花上露
幾招渴燕下雕梁

一雨

遙望叢林一塔孤
蹇驢日轉古城隅
夜來一雨添新漲
潏潏灘頭漸欲無

和楊尚書之美韵四首

河南夫子兩程子
一作公要與洙泗繼
後塵
濂溪先生為

張本舞雩風裏浴沂春

其二

諸公辨論助怪驚
削去訓傳非人情
大公至正本無我

吾道初如日月明

其三

東萊兩本不朽計讀詩原委有本因傷哉絕筆大事記
讀經未了已亡身

其四

漢儒俗學欺盲聾獨有一士超樊籠君家子雲晚治易
聖人門戶見重重

題劉德溫畫湖山豐夏橫幅

聞道神仙郭恕先曾將清夏寫湖山而今筆墨歸天上
時許劉郎見一斑

其二

湖山清夏不應豐一逕林陰水石中六月涼生清蕩底
釣魚船上一絲風

其三

風來山脚水淪漣林影參差舞鏡天袖裏長安遮日手
綠陰多處弄潺湲

其四

遠處微茫近處濃
岸容林意兩溶溶
夏山如醉無人畫
更倩劉郎作幾峰

題東坡畫古栢怪石圖三首

荒山老栢拚擁腫
相伴醜石反成妍
有人披圖笑領似
不材如我終天年

人生散材如散木
槁死深山病益奇
放出參天二千尺
安用荒藤纏繞為

東坡戲墨作樹石筆勢海上驅風濤畫師所難公所易
未必此圖如此高

雪望

吹面風來受雪寒寶花樓閣五雲端船移忽破瓊瑤影
丹鳳橋邊駐馬看

蟬

薄薄秋雲兩翼輕淤泥脫迹便恢聲可能枵腹涼陰底
受盡人間風露清

三蘓帖二首

他年鴻雁各分飛
風雨蕭蕭有所思
猶記讀書懷遠驛
夜深燈火對床時

又

君家一日會三蘓
翰墨人間今古無
時向明窗展橫幅
不須更寫德星圖

即事

樓頭不見暮山重
遙認清林雨意濃
一陣風來忽吹散

斷雲還補兩三峰

宿朱家寺

撤幕風來遠更清
窻閒野曠見雲生
夜深古殿無燈燭
畫壁時因掣電明

金水河

金水河邊駐馬時
熙春閣外夕陽微
舊時同樂園前水
曾照寒鴉幾度歸

晚登太史臺

雲鏤殘陽一線金
西風吹雨破層陰
歸鴉怪得紅翻背
返照依依在遠林

市橋

市橋落日與波平
返照前灣別舸明
不覺城頭來暝色
回看天際暮烟生

管幼安濯足圖

道喪何人識重輕
白頭不作魏公卿
滄浪濯足知君意
濁水那能浼我清

龐才卿畫長江圖

青山隱隱水悠悠何處長江是盡頭
欸乃一聲人不見忽從天際下歸舟

淨安寺紫蠟梅

倩誰傳語玉林神莫以時宜鬪斬新
只是舊時黃面老而今現作紫金身

題移刺右丞畫雙鹿

忘言老人畫雙鹿筆力不減東丹王
右相丹青乃餘事

向來勲業扶明昌

又

當年扈從直長楊想見秋山槲葉黃
沙外小灘圓似月
眼明雙鹿噉斜陽

坡陽歸隱圖

年過六秩尚蹉跎奈此坡陽歸隱何
不是不歸歸未得
家山雖好虎狼多

九日繁臺寺

九日登臨一散懷
繁臺寺裏插花迴
空明衣上波光動
知是扁舟泛月來

道傍古槐

虬枝盤屈尚百尺
不肯為人充棟梁
六月行人汗如洗
尚能於世作清涼

昭君出塞圖

無情漢月解隨人
羞向天涯照妾身
聞道將軍侯萬戶
已將功業上麒麟

子卿歸漢圖

節旄落盡始歸來
白髮龍鍾老可哀
猶勝生降不歸漢
將軍空有望鄉臺

龐才卿畫春山歸隱圖

了無車馬到山家
門外東風掃落花
春入山間人不見
無時無處不烟霞

同樂園二首

春歸空苑不成妍
柳影毵毵水底天
過却清明遊客少

晚風吹動釣魚船

又

石作墻垣竹映門
水迴山復幾桃源
毛飄水面知鶩柵
角出牆頭認鹿園

遊上清宮四首

陰陰垂柳淨朝暉
城郭山林果是非
步繞仙壇香露濕
紫玫瑰刺胃人衣

其二

醮罷琳宮日更長
坐看幡影午悠揚
幽人喚起青童睡
苔徑掃花筠簟香

其三

細細薰風淡淡陰
過雲拋雨上花心
黃鶯渴味沾微潤
飛上高枝作好音

其四

細雨薰風未熟梅
仙禽啄實下莓苔
夏芳將盡無多景
紅白葵花相背開

中牟陽冰篆

龍蛇起陸蟲蝕木商盤周鼓秦刻餘中牟三異今則四
斷碑殘缺陽冰書

過楊太尉墳

直道從來自不容斷碑千載尚塵封潼關關下墳三尺
清節高於太華峰

過長安二首

漢苑秦宮半夕陽年年春色管興亡霸橋斫盡青青柳

不為行人也斷腸

又

茂陵玉盃苔痕土魏帝金盤月泣津獨有乾陵陵上栢
年來風雨不能神

草堂

幾家籬落掩柴關盡在浮嵐湧翠間稻壠明邊通白水
竹梢缺處補青山

過咸陽二首

獨立橋邊望白雲
摩挲古塚石麒麟
千秋萬古功名骨
盡作咸陽原上塵

又

上林池籞鎖芳塵
直抵南山不屬人
世事千年陵谷變
千村桑柘鶉鴒春

題東坡與佛印帖

魯公食粥已數月
蘓子探囊無一錢
身後胡椒八百斛
爾曹堪笑亦堪憐

呼羣鳴鹿二首

麋斑剝落錯古錦
麋角輪囷生肉芝
呦呦誰見羣呼態
憶在秋山扈從時

又

霜林楓葉動秋山
誰道呦呦物性閒
同類呼羣更媒禍
世間何處不黃間

五嶽觀

瀏瀏清風下曲阿
亭亭午影轉庭柯
簾虛不捲通明處

時有流鶯趁蝶過

夜

悄悄小雨一燈熒猶記靈宮夜叩扇繞樹驚烏棲不定
踏翻栢子落堦庭

曉

一聲鶉鴝喚年芳底事驚回蝶夢長獨倚闌干梳白髮
滿襟清快曉風涼

暮

移床坐到晚涼時
手弄清泉似小兒
古觀無人蒼栢暗
偶看宿鳥暮投枝

荔支圖

雨滴鈴聲蜀道長
都緣一曲荔支香
宣和無限丹青手
好畫當年花石綱

臨韓幹馬

秋日平原看肉飛
千金市骨眼中稀
世間賴有丹青手
韓幹丹青又已非

載梅

滿車飽載梅花共車聲幽幽不成弄月落參橫畫角哀
橫眠正作梅花夢

鴻溝

山川依舊霸圖空楚漢分溝一映中金翅鳥王分海立
却應莞爾笑英雄

遊崆峒四絕

西鄰鳥鼠北朝那涇水東流入大河一上參雲亭上望

山川滿目夕陽多

其二

金湯形勢滿秦中
戰鼓驚飛北塞鴻
為向崆峒山試道
可能高枕聽松風

其三

斷碑零落任苔封
想像當時問道宮
烟鎖洞天三十六
時人空禮白雲中

其四

萬松聲裏暮濤寒盡在參雲一望間只欠懸流二千尺
天風吹下翠屏山

題東巖道人讀書屋

裕之先大夫讀書于此東巖其自號也

山頭佛屋五三間山勢相連石嶺關名字不妨從我改
更稱元子讀書山

哀李平父

平父能
詩善畫

妙畫清詩絕點塵丹青才了已無身釣臺即是西州路

長使羊曇淚滿巾

洮石硯

何年洮石鴨頭綠磨研來伴中書公
乞與玉堂揮翰手便應草檄繫西戎

跋黃華墨竹二首

老可能為竹寫真東坡解與竹傳神
墨君有語君知否須信黃華是可人

又

淡墨閒臨謝女真蕭然林下自風神
世間亦有丹青手只解尋常寫市人

閏八月十八日會同館諸公同賦絕句五首

一年十二度圓月及到中秋此夜偏
天意自憐風露爽更教明月十三圓

其二

閏年都未有新霜探借秋花十日香
徑約同僚同一醉有花有酒即重陽

其三

太平勝事古難并，且盡清歡伴醉醒。
座上少年三館秀，

也知傍有老人星。

東坡以把酒賦詩為太平勝事

其四

老去追歡強不能，少時思酒似痴癡。
佩刀左右更相笑，我已年來絕愛憎。

其五

賓主相忘間濁清，坐中談笑雜歌聲。
道人默坐無分別，

總是秋風萬籟鳴

馬上見桃花

可憐馬上逢春色不得明窓貯古瓶祇恐東風易零落
兔葵燕麥又青青

列子廟二首

天祿讐書已斷編枉將放蕩雜真詮如何得似東臯子
刪却楊朱力命篇

文粹有刪
東臯文

又

東土西天一幻緣先生古佛豈其仙
攘蓬指處無生死
勘破髑髏未兆前

翠微寺二首

南山常愛退之詩未說雲烟潤色之
要見山光如潑黛
更須留待雨晴時

又

南山深鎖翠微宮寺在山南十里東
祇怪朝來衫袖濕
不知身在翠微中

宿索水

楚漢相隨京索間
路人指點舊河關
英雄成敗一丘土
雲自高飛水自閒

平原店逢夏使

穹廬毳服異華風
馬上相逢一笑同
贈我何勞繞朝策
賀蘭千里已胸中

暮春用寒字韻二首

柳陰彩檻繫朱欄
樓外鞦韆搭畫杆
祓禊人歸池館靜

吹花風急皺波寒

又

一年芳物已闌珊
年少春愁為牡丹
村落人家雨前後
蓬窻罩紙護蠶寒

初聞鴈

囑爾南來新雁羣
封書好寄未歸人
天涯憔悴多風雪
回首中原又一春

宿遂初園

病身三日園亭主自慶還須把一盃猶勝西隣王學士
金門到老不曾來

別春

年年春去歸何處今日須為別一番把酒問花花不語
夜來風雨淚珊珊

淦水集卷九